

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON

OPĆINA ZAVIDOVIĆI

SLUŽBENI GLASNIK

OPĆINE ZAVIDOVIĆI

3/2001

21.3.2001.godine

SLUŽBENI GLASNIK IZDAJE:

Služba Općinskog vijeća, Općinskog
načelnika i službi za upravu

ODGOVORNI UREDNIK:

Hajrudin Katardžić, dipl.pravnik

Na osnovu člana 47. stav 2. Poslovnika Općinskog vijeća Zavidovići i člana 55. Statuta općine Zavidovići ("Službeni glasnik općine Zavidovići", broj 2/99), Općinsko vijeće Zavidovići na 13. sjednici održanoj dana 20.3.2001.godine, na prijedlog predsjedavajućeg Općinskog vijeća i sekretara Općinskog vijeća, donijelo je

PROGRAM RADA

Općinskog vijeća Zavidovići za 2001.godinu

U V O D

Pripreme za donošenje Programa rada Općinskog vijeća za 2001.godinu otpočele su u mjesecu novembru 2000.godine.

U sklopu tih priprema, a u cilju obuhvatnosti i kvalitetnije izrade Programa rada, Služba Općinskog vijeća, Općinskog načelnika i službi za upravu uputila je raspis, odnosno dopis svim službama za upravu, javnim ustanovama, preduzećima, mjesnim zajednicama i političkim partijama i strankama kojim su traženi prijedlozi i sugestije po pitanjima koje bi u okviru nadležnosti Općinskog vijeća trebalo ugraditi u Program rada Općinskog vijeća Zavidovići za 2001.godinu.

Do vremena izrade ovog Programa svoje prijedloge i sugestije, osim službi za upravu, dostavili su: Osnovna škola Gostović, Mjesne zajednica "Branioci grada", Alijansa političkih partija, Centra za socijalni rad i Socijaldemokratska partija.

U pristupu izradi Programa rada Općinskog vijeća Zavidovići za 2001.godinu moralo se voditi računa o nadležnosti općinskog organa i drugih službi, a saglasno tome i o nadležnosti Općinskog vijeća, pa iz tih razloga neki od prijedloga nisu mogli naći svoje mjesto u Programu rada. Isto tako radi neaktuelnosti, odnosno radi činjenice preobimnosti i širine programa pojedini prijedlozi nisu našli svoje mjesto u Programu rada, pa shodno tim činjenicama sačinjen je Program rada Općinskog vijeća Zavidovići za 2001.godinu, uz napomenu da su u odnosu na prijedloge programirani slični materijali.

I – KVARTAL

1. Tematski dio

- 1.1. Izvještaj o realizaciji zaključaka i odluka Općinskog vijeća,
- 1.2. Izmjene i dopune Statuta općine Zavidovići,
- 1.3. Izmjene i dopune Poslovnika o radu Općinskog vijeća Zavidovići,
- 1.4. Informacija o izvršenim pripremama za popis stanovništva 2001.godine,
- 1.5. Izvještaj o radu Općinskog načelnika Zavidovići,
- 1.6. Izvještaj o radu Općinskog štaba civilne zaštite,
- 1.7. Izvještaj o radu Općinskog sudije za prekršaje Zavidovići za 200.godinu,
- 1.8. Izvještaj o radu Općinskog pravobranilaštva Zavidovići za 2000.godinu,

- 1.9. Izvještaj o radu radnih tijela Općinskog vijeća,
- 1.10. Program rada Općinskog vijeća Zavidovići za 2001. godinu,
- 1.11. Program rada Općinskog načelnika Zavidovići,
- 1.12. Informacija o požarima u 2000. godini i stanje protupožarne zaštite,

2. Društveno-ekonomski odnosi

- 2.1. Program stambene izgradnje,
- 2.2. Izvještaj o izvršenju Budžeta općine Zavidovići za 2000. godinu,
- 2.3. Budžet općine Zavidovići za 2001. godinu,
- 2.4. Odluka o izvršenju Budžeta općine Zavidovići za 2001. godinu,
- 2.5. Smjernice za rješavanje stambene problematike na području općine Zavidovići,
- 2.6. Informacija o implementaciji izbornih rezultata,
- 2.7. Informacija o realizaciji Programa prikupljanja rezervi krvi u 2000. godini,
- 2.8. Program prikupljanja rezervi krvi za 2001. godinu,
- 2.9. Informacija o pružanju pravne pomoći građanima u 2000. godini,
- 2.10. Izvještaj o uspjehu i vladanju učenika osnovnih i srednjih škola na prvom polugodištu školske 2000/2001. godine,
- 2.11. Izvještaj o aktivnostima oko nadzidavanja zgrada,
- 2.12. Informacija o epidemiji žutice i pojavi drugih zaraznih bolesti u 2000. godini,

II – KVARTAL

1. Tematski dio

- 1.1. Analiza stanja korupcije i kriminala na području općine,
- 1.2. Informacija o aktivnostima Općinskog štaba civilne zaštite i načinu organizacije Štaba civilne zaštite u 2001. godini,
- 1.3. Informacija o upravnom rješavanju u općinskom organu i službama u 2000. godini,
- 1.4. Informacija o vršenju inspekcijskog nadzora u nadležnosti Općine u 2000. godini,
- 1.5. Informacija o privatizaciji imovine u vlasništvu Općine Zavidovići,
- 1.6. Informacija o bezbjednosti saobraćaja na području općine Zavidovići u 2000. godini,
- 1.7. Informacija o javnom redu i miru u 2000. godini,
- 1.8. Informacija o stanju vodosnabdijevanja u seoskim mjesnim zajednicama,

2. Društveno-ekonomski odnosi

- 2.1. Informacija o poslovanju javnih preduzeća u 2000. godini,
- 2.2. Informacija o radu javnih ustanova u 2000. godini,
- 2.3. Stanje školskih područja u osnovnom obrazovanju sa prijedlogom odluke o izmjeni školskih područja osnovnih škola i planom izgradnje i rekonstrukcije osnovnih škola u Smailbašićima i Poljicima,

- 2.4. Informacija o stanju Roma na području općine (zaposlenost, stambena problematika, školstvo),
- 2.5. Plan upisa učenika srednjih škola sa školsku 2001/2002. godinu,
- 2.6. Informacija o stanju vodozahvata "Suha", stanju primarne i sekundarne vodovodne mreže i mogućnosti proširenja gradskog vodovoda,
- 2.7. Informacija o korištenju i zaštiti voda rijeka Bosna, Krivaja i Gostović sa akcentom na eksploataciji riječnog materijala,
- 2.8. Izvještaj o radu udruženja građana boračkih populacija,
- 2.9. Informacija o naplati poreskih obaveza po općinskim propisima,
- 2.10. Informacija o broju nezaposlenih na području općine i struktura nezaposlenih prema evidencijama organa za zapošljavanje
- 2.11. Informacija o migraciji stanovništva sa područja općine, sa posebnim osvrtom na migraciju mladih,
- 2.12. Program uspostave katastra etažne svojine,
- 2.13. Informacija o aktivnostima uspostavljanja sanitarne deponije (tromjesečno),
- 2.14. Informacija o aktivnostima organa vlasti na sticanju uslova za građenje u zoni zabrane građenja u dolini rijeke Krivaje,
- 2.15. Informacija o ekonomskom stanju penzionera na području općine Zavidovići za 2000. godinu,

III – KVARTAL

1. Tematski dio

- 1.1. Informacija o provođenju zakona iz stambene oblasti,
- 1.2. Informacija o pojavama i upotrebi narkotika na području općine Zavidovići

2. Društveno-ekonomski odnosi

- 2.1. Informacija o zapošljavanju u državnom i privatnom sektoru sa osvrtom na bespravan rad,
- 2.2. Izvještaj o izvršenju Budžeta općine Zavidovići za period I-VI 2001. godine,
- 2.3. Stanje i problemi zaštite čovjekove okoline sa Prijedlogom odluke o obrazovanju ekološke policije,
- 2.4. Informacija o realizaciji Programa razvoja poljoprivrede sa prijedlogom mjera za naredni period,
- 2.5. Informacija o donatorskim i kreditnim sredstvima uloženim u razvoj poljoprivrede od 1995. godine,
- 2.6. Informacija o stanju u obrazovanju, kulturi, sportu i informisanju,
- 2.7. Informacija o raseljenim osobama i izbjeglim na području općine Zavidovići,
- 2.8. Informacija o aktivnostima izgradnje gradskog groblja,

IV – KVARTAL

1. Društveno-ekonomski odnosi

- 1.1. Informacija o provedenim aktivnostima male i velike privatizacije u preduzećima na području općine Zavidovići,

- 1.2. Informacija o izvršenom pošumljavanju u privatnim i državnim šumama,
- 1.3. Informacija o stanju komunalne infrastrukture na selu sa posebnim osvrtom na vodovode, odvoz smeća i kanalizaciju,
- 1.4. Izvještaj o uspjehu i vladanju učenika osnovnih i srednjih škola u školskoj 2000/2001.godini,
- 1.5. Informacija o licima u stanju socijalne potrebe u poratnom periodu na području općine Zavidovići,
- 1.6. Informacija o stanju i problemima maloljetničke delikvencije na području općine Zavidovići,
- 1.7. Informacija o smještaju djece u drugu porodicu kao oblik socijalne zaštite na području općine Zavidovići,
- 1.8. Izvještaj o ostvarivanju prava boraca, ratnih vojnih invalida i članova porodica poginulih boraca,
- 1.9. Smjernice razvoja općine Zavidovići do oktobra 2004.godine,
- 1.10. Nacrt Programa Vijeća za 2002.godinu,
- 1.11. Nacrt Programa načelnika općine za 2002.godinu,
- 1.12. Nacrt budžeta općine Zavidovići za 2002.godinu,

O S T A L O

1. Poslovi prostornog planiranja – sukcesivno prema ukazanim potrebama,
2. Rebalans Budžeta općine Zavidovići u slučaju da se prihodi Budžeta ne ostvaruju planiranom dinamikom,

MJERE ZA IZVRŠENJE PROGRAMA

- a) Obradivači stručnih materijala dužni su odgovarajuće materijale blagovremeno pripremiti i iste dostaviti u rokovima predviđenim ovim Programom i Poslovnikom o radu Općinskog vijeća Zavidovići,
- b) Obradivači materijala predviđene materijale će obrađivati i dostaviti u sažetoj formi, kvalitetnog sadržaja sa prijedlogom zaključaka koji će održavati sadržaj materijala i materijale učiniti provodljivim i konkretnijim,
- c) Materijali se dostavljaju u dovoljnom broju primjeraka za razmatranje istih na komisijama i tijelima Općinskog vijeća i na samom Općinskom vijeću,
- d) Sekretar Općinskog vijeća Zavidovići, blagovremeno će informisati Općinsko vijeće o svim odstupanjima i razlozima odstupanja od ovog Programa ili o potrebi stavljanja na dnevni red materijala koji nisu predviđeni ovim Programom,
- e) Normativni dio nije posebno iskazan u ovom Programu, a nacrti i prijedlozi odluka bit će rađeni u skladu sa potrebama i zakonskim obavezama,
- f) Općinski načelnik Zavidovići posebnim aktom će odrediti nosioce izrade pojedinih materijala po ovom Programu.

OPĆINA ZAVIDOVIĆI
- OPĆINSKO VIJEĆE -

PREDSJEDAVAJUĆI
OPĆINSKOG VIJEĆA

Broj:01/3-05-4451
Datum, 20.3.2001.godine

Fuad Berberović, s.r.

Na osnovu člana 4. stav 2. i člana 22. stav 1. tačka 1. Zakona o lokalnoj samoupravi ("Službene novine Zeničko-dobojskog kantona", broj 13/98), Općinsko vijeće Zavidovići, na 13. sjednici od 20.3. 2001.godine, usvojilo je

ODLUKU

o izmjenama i dopunama Statuta općine Zavidovići

Član 1.

U Statutu općine Zavidovići ("Službeni glasnik općine Zavidovići", broj 2/99), član 45. mijenja se i glasi:

"Mandat vijećnika Općinskog vijeća traje četiri godine, ukoliko zakonom ili drugim propisom nije drugačije propisano."

Član 2.

U članu 50. stav 1. riječi: "imenuje se na vrijeme od 2 (dvije) godine", zamjenjuju se riječima: "bira se na vrijeme od četiri godine, ukoliko zakonom ili drugim propisom nije drugačije propisano."

Član 3.

Član 53. mijenja se i glasi:

"Vijećnik u općinskom vijeću ne može se pozvati na krivičnu ili građansku odgovor. pritvoriti, niti na drugi način kažnjavati za izrečeno mišljenje ili glas koji je dao u općinskom vijeću."

Član 4.

Član 62. mijenja se i glasi:

"Mandat Općinskog načelnika traje četiri godine, ukoliko zakonom ili drugim propisom nije drugačije propisano."

Po isteku roka od četiri godine, isto lice može biti birano za općinskog načelnika pod uslovima propisanim zakonom ili drugim propisom."

Član 5.

Ova odluka stupa na snagu prvog narednog dana od dana objavljivanja u "Službenom glasniku općine Zavidovići."

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA ZAVIDOVIĆI
OPĆINSKO VIJEĆE

Broj: 01/3-05-4308/00
Datum, 20.3.2001.godine

PREDSJEDAVAJUĆI
OPĆINSKOG VIJEĆA

Fuad Berberović, s.r.

Na osnovu člana 75. stav 1.(d) Ustava Zeničko-dobojskog kantona ("Službene novine Federacije Bosne i Hercegovine", broj 7/96) i člana 55. stav 1. tačka 13. Statuta općine Zavidovići ("Službeni glasnik općine Zavidovići", broj 2/99), Općinsko vijeće Zavidovići na 13. sjednici od 20.3.2001.godine, donijelo je

ODLUKU

o izmjeni i dopuni Poslovnika Općinskog vijeća Zavidovići

Član 1.

U Poslovniku Općinskog vijeća ("Službeni glasnik općine Zavidovići", broj 1/98 i 3/98), član 6. mijenja se i glasi:

"Općinsko vijeće sastoji se od tridesetjednog vijećnika koji su izabrani na neposrednim, demokratskim, višestranačkim i tajnim izborima na teritoriji cijele općine, u skladu sa zakonom ili drugim propisom.

Mandat vijećnika traje četiri godine, ukoliko zakonom ili drugim propisom nije drugačije propisano."

Član 2.

U članu 8. iza stava 1. dodaju se stavovi 2.i 3. koji glase:

"Vijećnik o spriječenosti da prisustvuje sjednici vijeća ili sjednici radnog tijela vijeća može obavijestiti i sekretara Vijeća u pismenoj formi.

U slučaju da vijećnik mora napustiti sjednicu Vijeća iz određenih razloga dužan je o tome obavijestiti predsjedavajućeg Vijeća, odnosno radno predsjedništvo Vijeća i iznijeti razloge odsustvovanja".

Član 3.

Član 15. mijenja se i glasi:

"Vijećnik u općinskom vijeću ne može se pozvati na krivičnu ili građansku odgovornost, pritvoriti niti na drugi način kažnjavati za izrečeno mišljenje ili glas koji je dao u općinskom vijeću."

Član 4.

U članu 19. iza stava 2. dodaje se stav 3. koji glasi:

"Nakon održanih izbora i tehničke ovjere rezultata izbora, konstituirajuću sjednicu novog saziva općinskog vijeća saziva i njom predsjedava predsjedavajući Općinskog vijeća ranijeg saziva do izbora novog predsjedavajućeg Općinskog vijeća.""

- 55 -

Član 5.

U članu 20. stav 2. mijenja se i glasi:

“Verifikaciona komisija ima predsjednika, zamjenika predsjednika i dva člana.”

Član 6.

Iza člana 25. dodaju se novi članovi 25a, 25b. i 25c. koji glase:

“Član 25a.

Vijećniku prestaje mandat u slučajevima utvrđenim zakonom ili drugim propisom.

Vijećniku prestaje mandat danom kada Vijeće utvrdi da je nastupio neki od razloga utvrđenih zakonom ili drugim propisom.

Član 25b.

Vijećnik ima pravo da podnese ostavku i da je obrazloži.

Ostavka se pismeno podnosi predsjedavajućem Vijeća.

O ostavci vijećnika predsjedavajući Vijeća obavještava Vijeće.

Danom obavještavanja Vijeća o podnošenju ostavke vijećniku prestaje mandat.

Član 25c.

Vijećnik koji preuzme funkciju odnosno poslove i zadatke čije je vršenje, prema zakonu, nespojivo sa funkcijom vijećnika, dužan je o tome obavijestiti predsjedavajućeg Vijeća.

Predsjedavajući Vijeća obavještava o tome Vijeće koje utvrđuje da je vijećniku prestao mandat.”

Član 7.

U poglavlju 2. riječi: “predsjedavajući, zamjenik, pomoćnik i sekretar Vijeća”, zamjenjuju se riječima: “predsjedavajući Vijeća, zamjenik predsjedavajućeg Vijeća i sekretar Vijeća”.

Član 8.

Član 26. mijenja se i glasi:

“Općinsko vijeće ima predsjedavajućeg Vijeća, zamjenika predsjedavajućeg Vijeća i sekretara Vijeća.

Predsjedavajući Vijeća i zamjenik predsjedavajućeg Vijeća funkciju obavljaju volonerski.

Predsjedavajući Vijeća i zamjenik predsjedavajućeg Vijeća biraju se iz reda vijećnika.

Prijedlog za izbor predsjedavajućeg Vijeća i zamjenika predsjedavajućeg Vijeća podnosi Komisija za izbor i imenovanja na osnovu obavljenih i usaglašenih konsultacija sa predsjednicima političkih stranaka i partija koje imaju vijećnike u Vijeću.

Mandat predsjedavajućeg Vijeća i zamjenika predsjedavajućeg Vijeća je četiri godine.”

- 56 -

Član 9.

Član 27. mijenja se i glasi:

“Općinsko vijeće ima sekretara Vijeća koji funkciju obavlja profesionalno.

Sekretara Vijeća bira Vijeće na period od četiri godine na prijedlog Komisije za izbor i imenovanja.

Sekretar Vijeća ne može biti biran više od dva puta uzastopno na tu dužnost.”

Član 10.

U članu 29. stav 1. riječi: “ili pomoćnik predsjedavajućeg vijeća”, brišu se.

U članu 29. stav 2. mijenja se i glasi: “Zamjenik predsjedavajućeg Vijeća ima ista prava i obaveze u slučajevima kada zamjenjuje predsjedavajućeg Vijeća.”

Član 11.

Iza člana 29. dodaju se novi članovi 29a. i 29b. koji glase:

“Član 29a.

Predsjedavajući Vijeća, zamjenik predsjedavajućeg Vijeća i sekretar Vijeća čine Radno predsjedništvo sjednice Vijeća sa ovlašćenjima iz Statuta i ovog poslovnika.

Član 29b.

U Vijeću se obrazuje kolegij Vijeća kao konsultativno tijelo.

Kolegij Vijeća sastavljen je od predsjedavajućeg Vijeća, zamjenika predsjedavajućeg Vijeća, sekretara Vijeća i predsjednika klubova vijećnika.

Kolegij razmatra pitanja koja su od značaja za rad Vijeća.”

Član 12.

Član 36. mijenja se i glasi:

“Predsjednika radnog tijela u slučaju njegove odsutnosti ili spriječenosti zamjenjuje zamjenik predsjednika.”

Član 13.

U članu 43. stav 1. iza riječi: “godinu”, tačka se zamjenjuje zarezom i dodaju riječi: “po pravilu, do početka godine.”

Član 14.

Član 45. mijenja se i glasi:

“U pripremi za izradu Programa rada Vijeća predsjedavajući, zamjenik predsjedavajućeg i sekretar Vijeća pribavljaju prijedloge i mišljenja o pitanjima koja treba unijeti u Program rada Vijeća.

Prijedlozi i mišljenja pribavljaju se od vijećnika, radnih tijela Vijeća, klubova vijećnika, općinskog načelnika i drugih organa i organizacija.”

- 57 -

Član 15.

Član 46. mijenja se i glasi:

“Prijedlog programa rada utvrđuju predsjedavajući Vijeća, zamjenik predsjedavajućeg Vijeća, sekretar Vijeća i predsjedavajući stalnih radnih tijela, a usvaja ga Vijeće.”

Član 16.

Član 47. briše se.

Član 17.

U poglavlju VI, u podtački 1. riječi: “sazivanje sjednice, predlaganje i utvrđivanje dnevnog reda”, zamjenjuju se riječima: “sazivanje sjednice.”

Član 18.

Član 48. mijenja se i glasi:

“Sjednicu Vijeća saziva predsjedavajući Vijeća.

Sjednicu Vijeća sazvat će predsjedavajući i po zaključku Vijeća.

Sjednicu Vijeća sazvat će predsjedavajući i po prijedlogu Općinskog načelnika, stalnog radnog tijela Vijeća ili na prijedlog jedne petine vijećnika u Vijeću u pismenoj formi.”

Član 19.

Iza člana 48. dodaje se novi član 48a. koji glasi:

“Član 48a.

Poziv za sjednicu Vijeća upućuje se vijećniku najkasnije osam dana prije dana određivanja za održavanje sjednice.

Uz poziv za sjednicu, sa prijedlogom dnevnog reda, vijećniku se dostavljaju odgovarajući materijali za raspravljanje i odlučivanje o pitanjima koja su predložena za dnevni red sjednice i zapisnik sa prethodne sjednice, ukoliko ranije nisu dostavljeni.

Zapisnik sa prethodne sjednice dostavlja se u izvodu, ukoliko Vijeće ne odluči drugačije.

Izuzetno, predsjedavajući Vijeća, može izuzetno u hitnim slučajevima sazvati sjednicu Vijeća u roku kraćem od osam dana, a dnevni red predložiti na samoj sjednici Vijeća.

Predsjedavajući Vijeća će obavijestiti Vijeće o razlozima hitnosti zakazivanja sjednice.”

Član 20.

Član 49. briše se.

Član 21.

Ispred člana 50. dodaje se nova podtačka 2. koja glasi: “Predlaganje dnevnog reda.”

Član 22.

Član 50. mijenja se i glasi:

“Dnevni red sjednice Vijeća predlaže predsjedavajući Vijeća.

- 58 -

U dnevni red unose se ona pitanja koja su predsjedavajućem Vijeća dostavili ovlašteni predlagači.”

Član 23.

Član 51. mijenja se i glasi:

“Prijedlog dnevnog reda, može se izuzetno na sjednici Vijeća proširiti ili smanjiti. Prijedlog za proširenje ili smanjenje prijedloga dnevnog reda može dati svaki vijećnik, Klub vijećnika, stalno radno tijelo Vijeća ili Općinski načelnik. Ovlašteni predlagači iz prethodnog stava dužni su obrazložiti hitnost ovakog prijedloga.”

Član 24.

Član 52. mijenja se i glasi:

“Sjednicom Vijeća, predsjedava predsjedavajući Vijeća, zamjenik predsjedavajućeg Vijeća ili lice koje vrši tu funkciju u slučaju spriječenosti predsjedavajućeg Vijeća, odnosno zamjenika predsjedavajućeg Vijeća, a u skladu sa ovim Poslovníkom.”

Član 25.

Član 54. mijenja se i glasi:

“Pravo i dužnost da učestvuje u radu na sjednici Vijeća imaju vijećnici u Vijeću. U radu na sjednici Vijeća mogu učestvovati bez prava odlučivanja:

- Općinski načelnik,
- druga lica koja su pozvana na sjednicu radi iznošenja mišljenja o pitanjima koja su na dnevnom redu sjednice.”

Član 26.

Član 55. mijenja se i glasi:

“Vijećnik, odnosno učesnik u sjednici može govoriti kada dobije riječ od predsjedavajućeg. Predsjedavajući daje riječ učesnicima na sjednici po redu prijavljivanja. Prijava za riječ može se podnositi sve do završetka pretresa. Vijećnik i drugi učesnici na sjednici moraju da svoja izlaganja prilagode sadržini i značaju pitanja o kojima se vodi pretres po utvrđenom dnevnom redu. Predsjedavajući se stara da govornik ne bude ometan u toku svog izlaganja, U slučaju da se vijećnik ili drugi učesnik na sjednici udalji od dnevnog reda, predsjedavajući će ga upozoriti da se drži dnevnog reda, odnosno oduzeti mu riječ.”

Član 27.

Član 57., briše se.

Član 28.

U članu 58. iza stava 2. dodaju se novi stavovi 3. i 4. koji glase:

“Predsjedavajući Vijeća može prekinuti rad sjednice kada ocijeni da je to cjelishodno, a posebno radi obavljanja određenih konsultacija.

Na sjednici Vijeća se može odlučiti da jedan učesnik u raspravi, odnosno pretresu o istom predmetu, može govoriti samo jedanputa, a može se ograničiti i vrijeme trajanja govora.”

- 59 -

Član 29.

U članu 75. stav 2. riječi: "odnosno pomoćnik predsjedavajućeg Vijeća", brišu se.

Član 30.

U članu 76. stav 1. riječi: "i pomoćnika", brišu se.

U članu 76. stav 2. riječi: "i pomoćnika", brišu se.

Član 31.

U članu 78. stav 1. iza riječi: "zamjenika", dodaju se riječi: "predsjedavajućeg Vijeća", a riječi: "i pomoćnika", brišu se.

Član 32.

Iza člana 82. dodaje se novi član 82a., koji glasi:

"Član 82a.

Kada se izbor vrši tajnim glasanjem, predsjedavajućem pomaže zamjenik predsjedavajućeg i dva vijećnika, izabrana na sjednici i sekretar Vijeća".

Član 33.

Iza člana 83. dodaje se novi član 83a., koji glasi:

"Član 83a.

Kada funkcioneri koje je izabralo Vijeće podnesu ostavku, predsjedavajući Vijeća o tome obavještava organ koji je nadležan da predloži njegov izbor, radi davanja mišljenja, kao i Komisiju za izbor i imenovanja.

Po prijemu mišljenja iz prethodnog stava, predsjedavajući Vijeća, podnesak o ostavci funkcionera, zajedno sa mišljenjem, dostavlja vijećnicima Vijeća.

Vijeće razmatra ostavku i može odlučiti da je uvaži iz razloga navedenog u njenom obrazloženju.

Vijeće može odlučiti da ostavku ne uvaži ako ocijeni da postoje razlozi za utvrđivanje odgovornosti podnosioca ostavke.

Ako utvrdi da postoje razlozi za utvrđivanje odgovornosti, u smislu prethodnog stava, Vijeće će provesti postupak za smjenjivanje ili opoziv sa funkcije podnosioca ostavke."

Član 34.

Član 88. mijenja se i glasi:

"Općinsko vijeće donosi Statut, odluke, određena planska dokumenta općine, usvaja Budžet općine, Završni račun Budžeta općine, Poslovnik, deklaracije, rezolucije, smjernice, preporuke, zaključke i daje autentična tumačenja odluka koje je donijela i utvrđuje prečišćeni tekst odluka i drugog akta općine.

Vijeće daje autentično tumačenje odluke koje je donijelo.

Vijeće može ovlastiti Komisiju za propise i Statut da utvrdi prečišćeni tekst odluke ili drugog propisa kojeg je donijela."

Član 35.

Član 104. mijenja se i glasi:

“Inicijativu za donošenje odluke mogu pokrenuti organizacije iz oblasti privrednih i drugih djelatnosti, organizacije i udruženja građana, državni organi, građani i opća udruženja i zajednice, pravna i fizička lica.

Inicijativa za donošenje odluke dostavlja se predsjedavajućem Vijeća.

Predsjedavajući Vijeća inicijativu dostavlja nadležnom tijelu.

Inicijativu prethodno razmatra Komisija za propise i Statut. O sjednici radnog tijela na kojoj se razmatra inicijativa, obavještava se i podnosilac inicijative.

Zaključkom o prihvatanju inicijative Vijeće određuje način pripremanja i nosioce izrade odluke.”

Član 36.

U članu 106. iza stava 1. dodaje se novi stav 2 koji glasi:

“Ako nacrt odluke nije podnio općinski načelnik, predsjedavajući Vijeća dostavlja nacrt odluke i općinskom načelniku radi davanja mišljenja.”

Član 37.

Iza člana 106. dodaje se novi član 106a, koji glasi:

“Član 106a.

Predsjedavajući Vijeća, po prijemu dostavlja nacrt odluke vijećnicima.

Nacrt odluke može se pretresati na sjednici Vijeća po isteku roka od 15 dana od dana dostavljanja vijećnicima.

Prije pretresa nacrt odluke na sjednici Vijeća nacrt odluke razmatra nadležno radno tijelo Vijeća i o tome podnosi izvještaj Vijeću.”

Član 38.

U članu 107. iza stava 2. dodaje se novi stav 3. koji glasi:

“Vijeće može odlučiti da pretres nacrt odluke obuhvata opći pretres i pretres u pojedinostima.”

Dosadašnji stavovi 2. i 3. postaju stavovi 3. i 4.

U stavu 3. iza riječi: “da”, dodaje se riječ: “se”.

Član 39.

Član 114. mijenja se i glasi:

“Na podnošenje prijedloga odluke Vijeću u pogledu rokova dostave vijećnicima, pretresa na sjednici Vijeća i razmatranja prijedloga odluke na radnom tijelu Vijeća, shodno se primjenjuju odredbe ovog poslovnika koje se odnose na nacrt odluke.

Podnosilac prijedloga odluke može da do završetka pretresa predloži Vijeću da se pretres prijedloga odluke odloži.

Općinski načelnik može da predloži da se odloži pretres prijedloga odluke i ako općinski načelnik nije podnio prijedlog.

- 61 -

O prijedlozima iz stava 2. i 3. ovog člana Vijeće odlučuje odmah.
Podnosilac prijedloga odluke može da do otvaranja pretresa povuče svoj prijedlog odluke."

Član 40.

Član 115. mijenja se i glasi:

"Pravo predlaganja amandmana ima svaki vijećnik u Vijeću, radno tijelo Vijeća i Općinski načelnik."

Član 41.

Član 123. mijenja se i glasi:

"Inicijativu za davanje autentičnog tumačenja odluke mogu podnijeti građani, političke stranke, udruženja građana, preduzeća i druga pravna lica.

Prijedlog za davanje autentičnog tumačenja odluke može podnijeti svaki vijećnik u Vijeću, radno tijelo Vijeća i Općinski načelnik.

Prijedlog, odnosno inicijativa za davanje autentičnog tumačenja podnosi se predsjedavajućem Vijeća, a mora da sadrži naziv odluke i navođenje odredbe za koju se traži tumačenje sa obrazloženjem."

Član 42.

Iza člana 123. dodaje se novi član 123a. koji glasi:

"Član 123a.

Predsjedavajući Vijeća upućuje inicijativu odnosno prijedlog Komisiji za propise i Statut i općinskom načelniku, ako oni nisu podnosioci prijedloga za davanje autentičnog tumačenja odluke.

Komisija za propise i Statut, nakon pribavljanja potrebnih mišljenja i dokumentacije od općinskog načelnika i drugih nadležnih tijela, te organa nadležnih za sprovođenje odluke ili izvršavanja odluke, ocjenjuje da li su inicijativa odnosno prijedlog za davanje autentičnog tumačenja osnovani.

Ako utvrdi da je inicijativa osnovana, Komisija za propise i Statut utvrdit će prijedlog autentičnog tumačenja koji sa svojim izvještajem podnosi Vijeću.

Ako Komisija za propise i Statut ocijeni da prijedlog odnosno inicijativa za davanje autentičnog tumačenja nisu osnovani, o tome će obavijestiti predsjedavajućeg Vijeća.

Odluku o osnovanosti za davanje autentičnog tumačenja odluke donosi Vijeće.

Autentično tumačenje odluke objavljuje se u "Službenom glasniku općine Zavidovići".

Član 43.

Član 124. mijenja se i glasi:

"Kada je odlukom Vijeća određeno da Komisija za propise i Statut uradi prečišćeni tekst odluke, u roku kojeg odredi Vijeće, taj prečišćeni tekst odluke Komisiji za propise i Statut dostavlja općinski načelnik odnosno služba za upravu koja je određena da provodi ili izvršava odluku.

Komisija za propise i Statut utvrđuje prečišćeni tekst odluke koji sadrži integralni tekst odluke čiji se tekst utvrđuje.”

Član 44.

Član 127. mijenja se i glasi:

“Prijedlog za promjenu Statuta dostavlja se predsjedavajućem Vijeća.

Predsjedavajući Vijeća podneseni prijedlog upućuje vijećnicima Vijeća, Komisiji za propise i Statut i drugim radnim tijelima Vijeća, općinskom načelniku i drugim organima i organizacijama koje odredi predsjedavajući Vijeća.

Svi subjekti iz prethodnog stava dužni su u roku od deset dana razmotriti predložene izmjena i svoje stavove i mišljenja dostaviti predsjedavajućem Vijeća.

Predsjedavajući Vijeća upoznaje predlažača sa stavovima i mišljenjima koji su mu dostavljeni.

Tekst nacrti i prijedloga akte o promjeni Statuta općine priprema Komisija za propise i Statut i dostavlja ga predsjedavajućem Vijeća.”

Član 45.

Ova odluka se ima objaviti u “Službenom glasniku općine Zavidovići”, a stupa na snagu prvog narednog dana od dana objavljivanja u “Službenom glasniku općine Zavidovići.”

Član 46.

Ovlašćuje se Komisija za propise i Statut da sačini prečišćeni tekst Poslovnika Općinskog vijeća Zavidovići.

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA ZAVIDOVIĆI
OPĆINSKO VIJEĆE

PREDSJEDAVAJUĆI
OPĆINSKOG VIJEĆA

Fuad Berberović, s.r.

Broj: 01/3-05-4309/00
Datum, 20.3.2001.godine

Na osnovu člana 13. i u vezi sa članom 12. i člana 55. Statuta općine Zavidovići ("Službeni glasnik općine Zavidovići", broj 2/99), Općinsko vijeće Zavidovići na 13. sjednici održanoj dana 20.3.2001. godine, donijelo je

O D L U K U

o ustanovljenju i dodjeli Spomen plakete općine Zavidovići i drugih općinskih priznanja

Član 1.

Ustanovljavaju se javna priznanja na području općine Zavidovići i to:

1. Spomen plaketa općine Zavidovići,
2. Pismena pohvala,
3. Pismena zahvalnica,
4. Proglašavanje počasnog građanina,
5. Novčana nagrada i
6. Nagrada u predmetima.

Kao priznanja za ostvarene izuzetne rezultate u radu, doprinosu i razvoju privrednih i društvenih djelatnosti, doprinosu u razvoju komponenti odbrane, u sferi humanitarnog rada i drugim aktivnostima i djelatnostima koje doprinose razvoju i ugledu općine Zavidovići, Federacije Bosne i Hercegovine i Bosne i Hercegovine.

I – SPOMEN PLAKETA OPĆINE ZAVIDOVIĆI

Član 2.

Spomen plaketa općine Zavidovići je najviše priznanje općine Zavidovići i u pravilu dodjeljuje se pojedincima, preduzećima, javnim ustanovama, udruženjima građana, humanitarnim organizacijama, vjerskim zajednicama, vojnim jedinicama jedanput godišnje u povodu 15.septembra – Dana općine Zavidovići.

Član 3.

Spomen plaketa se može dodijeliti samo jedanput pojedincu ili kolektivu.

Član 4.

Spomen plaketa se može dodijeliti i strancu državljaninu i stranoj organizaciji.

Član 5.

Spomen plaketu dodjeljuje Općinsko vijeće Zavidovići svojom odlukom.

1. KRITERIJI ZA DODJELU SPOMEN PLAKETE

Član 6.

Kriteriji za dodjelu Spomen plakete pojedinačnim dobitnicima su:

- da je dao značajan doprinos u odbrambenom ratu '92.-'95.godine,
- da se svojim radom i zalaganjem ističe, da je uzor u radnoj i sredini u kojoj živi, da svojom angažovanošću doprinosi ostvarivanju neposrednih zadataka koji omogućavaju brži razvoj općine Zavidovići,
- da u okviru javnog angažmana zastupa i ostvaruje ciljeve i interese svih građana općine Zavidovići,
- da na bazi opštedruštvenih resursa iskazuje organizacione i druge sposobnosti čime se unapređuje radni i drugi proces pojedinačnog djelovanja,
- da u sferi humanitarnog rada iskazuje izuzetne rezultate na dobrobit svih stanovnika općine Zavidovići,
- da svojim angažmanom stvara uslove i omogućuje razvoj u oblasti kulture, sporta, informisanja, obrazovanja, zdravstva iz čega proizilaze vidljivi rezultati sredine u kojoj djeluje,
- da iskazuje sposobnosti i odlučnost u razvoju komponenti odbrane i zaštite,
- da je u izuzetnim situacijama iskazana lična hrabrost u spašavanju ljudi i materijalnih dobara,
- da nije krivično kažnjavao i da se protiv njega ili nje ne vodi krivični postupak.

Član 7.

Kriteriji za dodjelu Spomen plakete kolektivima-preduzećima, javnim ustanovama, vojnim jedinicama, vjerskim zajednicama, udruženjima građana i humanitarnim organizacijama su:

- da su u sferi poslovanja i djelovanja postignuti izuzetni rezultati koji omogućuju veću proizvodnju ili pružene usluge, zapošljavanje i ostvarivanje značajnog rasta ekonomskih pokazatelja uspješnog rada,
- da je na bazi racionalizacije, modernizacije i organizacionih promjena došlo do značajnih ušteda uz postizanje boljih rezultata u odnosu na prethodne periode, te da to značajnije utiče na razvoj općine u sferama djelovanja,
- da su postignuti rezultati naučno-istraživačkog rada znatno uticali na humanizaciju posla i uvođenjem savremenih metoda u poslovanju,
- da su na bazi profita ostvareni značajni izvozni poslovi,
- da je kvalitetno i u intereseu državnog kapitala i radnika izvršena privatizacija,
- da su na zadovoljstvo građana i ostvarivanje njihovih interesa obezbjeđeni kvalitetni uslovi rada i pružanja usluga u oblasti obrazovanja, zdravstva, kulture i sporta, socijalnim i drugim društvenim djelatnostim,
- da su djelovanjem dati rezultati u razvoju kulturnih, nacionalnih i vjerskih osobenosti naroda i narodnosti,
- da su na polju humanitarnog djelovanja ostvareni zajednički interesi građana općine Zavidovići.

2. POSTUPAK ZA DODJELU

Član 8.

Inicijativu za dodjelu Spomen plaketa općine Zavidovići mogu dati državni i drugi organi,

preduzeća i druga pravna lica političke partije i stranke, udruženja građana, vjerske zajednice, vojne jedinice i druge društvene organizacije.

Član 9.

Inicijativa-prijedlog za dodjelu Spomen plakete mora biti obrazložena i sadržavati konkretne podatke o pojedincu ili kolektivu, a isto tako treba da sadrži razlog predlaganja koji su sadržani u članu 6. i 7. ove odluke.

Ispunjenje kriterija iz člana 6. i 7. ne treba biti kumulativno.

Član 10.

Inicijativa-prijedlog za dodjelu Spomen plakete u pismenom obliku sa kvalitetnim obrazloženjem podnosi se Komisiji za odlikovanja i javna priznanja u roku koga odredi Komisija.

Član 11.

Komisija za odlikovanja i javna priznanja na zasjedanju razmatra sve u roku prispjele inicijative i prijedloge, određuje dobitnike pojedinačnih i kolektivnih priznanja i u pismenoj formi u vidu prijedloga odluke dostavlja Općinskom vijeću na razmatranje i usvajanje.

Spomen plaketu u principu ne može dobiti lice koje je član Komisije za odlikovanja i javna priznanja, sve dok mu traje mandat u Komisiji.

Na zasjedanju Komisije ne može biti prisutno lice koje je kandidat za dodjelu Spomen plakete, bez obzira koju funkciju obnaša.

Član 12.

Konačnu odluku o dodjeli Spomen plakete općine Zavidovići donosi Općinsko vijeće Zavidovići.

Član 13.

Spomen plaketa općine ima oblik usvojenog grba općine Zavidovići i uz nju se izdaje i pismena diploma koju potpisuje predsjedavajući Općinskog vijeća Zavidovići.

Veličina, oblik i boja kao i ostali elementi pismene diplome bit će utvrđeni naknadno.

Na pismenoj diplomu za svakog dobitnika dat će se i razlog dodjele.

Član 14.

Spomen plaketu na sjednici Općinskog vijeća Zavidovići uručuje predsjedavajući Općinskog vijeća ili drugo lice iz reda vijećnika koga ovlasti predsjedavajući Općinskog vijeća.

Član 15.

Spomen plaketa se može dodijeliti pojedincu posthumno, a Plaketu prima član domaćinstva umrlog.

Član 16.

Promet Spomen plaketom nije dozvoljen.

II – PISMENA POHVALA I PISMENA ZAHVALNICA

Član 17.

Pismena pohvala i pismena zahvalnica dodjeljuju se povremeno – prema ukazanoj potrebi kao znak priznanja pojedincu i kolektivu za postignute rezultate u radu, djelovanju na humanitarnom planu, iskazanoj požrtvovanosti i u drugim slučajevima za koje se ocijeni da su značajni za poboljšanje općeg stanja življenja na području općine Zavidovići.

Član 18.

Uz pismenu pohvalu i pismenu zahvalnicu može se dodijeliti i znak općine predstavljen grbom općine Zavidovići.

Član 19.

Pismena pohvala i pismena zahvalnica mogu se dodijeliti i stranom državljaninu i stranoj organizaciji.

Član 20.

Prijedlog za pismenu pohvalu i pismenu zahvalnicu mogu uputiti svi subjekti sa područja općine uz obrazloženje razloga za dodjelu i iskazivanja polja djelovanja predloženog pojedinca ili organizacije.

Član 21.

Pismenu pohvalu i pismenu zahvalnicu dodjeljuje Općinski načelnik Zavidovići.

III – POČASNI GRAĐANIN OPĆINE ZAVIDOVIĆI

Član 22.

Za počasnog građanina općine Zavidovići može biti predložen svaki pojedinac čije mjesto boravka nije na području općine Zavidovići.

Za počasnog građanina može biti predložen i strani državljanin.

Član 23.

Za počasnog građanina općine Zavidovići može biti predložen pojedinac koji svojim radom i djelovanjem afirmiše općinu Zavidovići u zemlji i inostranstvu, koji organizuje i obezbjeđuje značajnu humanitarnu pomoć stanovništvu općine, koji djeluje promotivno u ime općine Zavidovići i pomaže njen ukupni privredni i društveni razvoj ili djeluje u razvoju pojedinih segmenata privrednog i društvenog života.

Član 24.

Prijedlog za proglašenje pojedinca za počasnog građanina općine Zavidovići uz obrazloženje mogu dati organizacije i zajednice, državni organi i druge sredine sa područja općine Zavidovići.

- 67 -

Član 25.

Obrazložen prijedlog dostavljaju se Komisiji za odlikovanja i javna priznanja koja nakon razmatranja inicijative u vidu prijedloga odluke dostavlja Općinskom vijeću na usvajanje.

Član 26.

Odluku o proglašenju pojedinca počasnim građaninom općine Zavidovići donosi Općinsko vijeće Zavidovići, o čemu se izdaje pismeni akt.

Član 27.

Pismeni akt o proglašenju pojedinca počasnim građaninom općine Zavidovići uručuje predsjedavajući Općinskog vijeća.

IV – NOVČANA NAGRADA

Član 28.

Novčana nagrada u skladu sa raspoloživim sredstvima u Budžetu općine Zavidovići dodjeljuje se dobitnicima Spomen plakete općine Zavidovići uz dodjelu Spomen plakete. Novčana nagrada dodjeljuje se pojedincima.

Član 29.

Visina novčane nagrade zavisi od planiranih sredstava u Budžetu općine Zavidovići za budžetsku godinu u kojoj se dodjeljuju Spomen plakete i od priliva sredstava u Budžetu.

Član 30.

Visinu novčane nagrade saglasno uslovima iz člana 29. predlaže Komisija za odlikovanja i javna priznanja, a Odluku donosi Općinsko vijeće Zavidovići.

V – NAGRADA U PREDMETIMA

Član 31.

Pod nagradom u predmetima podrazumijeva se dodjela umjetničke slike ili drugog predmeta u nivou suvenira.

Član 32.

Nagrada u predmetu dodjeljuje se pojedincima ili organizacijama u povodu određenih jubileja, prijema, a vezano za njihove rezultate u radu i doprinosu u razvoju općine Zavidovići.

Član 33.

Za dodjelu nagrade u predmetima prijedlog mogu dati organizacije i zajednice na području općine Zavidovići.

- 68 -

Član 34.

Predmet koji se dodjeljuje nosit će pismenu oznaku darodavca i primaoca.

Član 35.

Nagradu u predmetu dodjeljuje Općinski načelnik Zavidovići.

Općinski načelnik Zavidovići će tromjesečno informisati Općinsko vijeće o datim pohvalama, zahvalnicama i predmetima.

Član 36.

O datim javnim priznanjima vodi se posebna evidencija.

Evidenciju iz stava 1. ovog člana vodi Služba Općinskog vijeća, Općinskog načelnika i službi za upravu.

Član 37.

Stručne i administrativne poslove za potrebe Komisije za odlikovanja i javna priznanja vodi Služba Općinskog vijeća, Općinskog načelnika i službi za upravu.

Član 38.

Stupanjem na snagu ove odluke, prestaje da važi Odluka o ustanovljenju i dodjeli Spomen plakete općine Zavidovići ("Službeni glasnik općine Zavidovići", broj 7/98).

Član 39.

Ova odluka stupa na snagu danom donošenja i bit će objavljena u "Službenom glasniku općine Zavidovići".

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA ZAVIDOVIĆI
- OPĆINSKO VIJEĆE -

PREDSJEDAVAJUĆI
OPĆINSKOG VIJEĆA

Fuad Berberović, s.r.

Broj: 01/3-49-3513/00
Datum, 20.3.2001.godine

Na osnovu člana 55. Statuta Općine Zavidovići ("Službeni glasnik Općine Zavidovići", broj 2/99) i člana 33. i 34. Poslovnika Općinskog vijeća Zavidovići ("Službeni glasnik Općine Zavidovići", broj 9/97 i 3/98), Općinsko vijeće Zavidovići na 13.sjednici održanoj 20.3.2001. godine donijelo je

R J E Š E N J E

o izboru predsjednika i članova Komisije za statut i propise

I

U Komisiju za statut i propise izabrani su:

1. ŠEMSUDIN MUHIĆ - za predsjednika,
2. HAMID SULJIĆ – za zamjenika predsjednika,
3. REMZO SINANOVIĆ – za člana,
4. NERMINA SULJIĆ – za člana,
5. MIRSAD ĐERZIĆ – za člana,
6. NIKICA JUKIĆ – za člana,
7. NAKIB VUKOVIĆ – za člana

II

Ovo rješenje stupa na snagu danom donošenja, a naknadno će se objaviti u "Službenom glasniku Općine Zavidovići".

III

Stupanjem na snagu ovog rješenja, prestaje da važi Rješenje broj 01/3-05-2196 od 18.7.2000.godine.

OPĆINA ZAVIDOVIĆI
- OPĆINSKO VIJEĆE -

Broj: 01-34-499
Datum, 20.3.2001. godine

PREDSJEDAVAJUĆI
OPĆINSKOG VIJEĆA

Fuad Berberović

S A D R Ź A J**I – AKTI OPĆINSKOG VIJEĆA**

1. PROGRAM RADA Općinskog vijeća Zavidvići za 2001.godinu	49
2. ODLUKA o izmjenama i dopunama Statuta općine Zavidovići	53
3. ODLUKA o izmjeni i dopuni Poslovnika Općinskog vijeća Zavidovići	54
4. ODLUKA o ustanovljenju i dodjeli Spomen plakete općine Zavidovići i drugih općinskih priznanja	63
5. RJEŠENJE o izboru predsjednika i članova Komisije za statut i propise	69